



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tirymyim@aolima



tir yimyim

TAPAK 8

Justice NV Ramana-i Chief Justice of India (CJI) tenangzükba agi

Merkel-i German nungertem dang tetuyuba sülen anidaktsü mepeshi



VOL. XVIII NO. 190 (ADOK 190) DIMAPUR

AMUNGNÜ (SUNDAY)

RONGCHII (APRIL) 25, 2021

₹ 5.00

Kohima DC-i 'Containment Zone' indang nenshir

Dimapur, April 24 (TYO): Containment Zone telungi aitsü mesüra temai adoktsü özüingi memelar ta Kohima Deputy Commissioner, Gregory Thejawelie NCS-i nenshia metetdaksüogo.

Containment Zone lateta aliba nung aibelenertem Disaster Management Act, 2005 nung arrla 51 aser 60 aser Indian Penal Code nung arrla 188 kübok temerenshi alitsü, ta Kohima DC-isa ashi.

Assam-i gari ajanga arur ajak dak COVID-19 tendangtsü

Kokrajhar, April 24 (Agencies): Assam-i gari lenmang ajanga arurtem ajak dak COVID-19 tendangtsü ta sorkari metetdaksüogo.

Assam-Bengal inter-state arrtsü anasa Kokrajhar district nung state sorkari Srirampur nung COVID-19 testing centre ka lapokogo.

Maneni, iba tesem nung isolation centre ka lapokogo.

Truck, bus aser tanga garitem ajanga arur ajak check-gate nung COVID-19 tendangtsü. Idangji COVID-19 aliba putetertempei district nung aliba mozü kidangi anir aotsü.

Assam-Bengal inter-state border nungsa Dhubri district kübok Chagolia check-gate nunga COVID-19 testing centre lapokogo.

COVID-19 Nagaland: Nisung 13,000 adenogo

Kohima, April 24 (TYO): Honibarnü Nagaland nung COVID-19 puteter ajak agi nisung 13,000 tema kümogo. Tesüiba ghonda 24 tsüngda nisung 114 dak COVID-19 putetba züngsema nisung 13,003 kümogo.

"Tanü nisung 114 dak COVID-19 putet. Parnokji Dimapur nung 101, Kohima nung 5, Phek nung 7 aser Mokokchung nung 2 lir" ta Health & Family Welfare Minister, S Pangnyu Phom-i metetdaksü.

Taküm Nagaland nung nisung timtiba dak COVID-19 putetbaji tanü liasü. March 31, 2021 nü nisung 107 dak putetba sülen tanü 114 dak putet, ta paisa ashi.

Tanü COVID-19 nungi taneptsü angur shinga maliasü aser iba jagi tang tashi nung nisung 12,117 taneptsü nguogo aser 555 anepaludar, ta Minister Pangnyu-isa shisem.

"Nagaland nung COVID-19 nungi taneptsü angur 93.2% dang

lir" ta State Nodal Officer for Integrated Disease Surveillance Programme, Dr Nyanthung Kikon-i metetdaksü.

Tesüiba ghonda 24 tsüngda Dimapur district nung COVID-19 agi shiranger 3 asüba züngsema tasür ajak agi 98 kümogo. Tasürtem rongnung nisung 10 bo tanga timtem ajanga asü aser 3 asüba kuli bushitepdar, ta paisa ashi.

Nisung 233 tashi tanga state temi ogo, ta Dr Kikon-isa shisem.

Tang anepalurtem rongnung nisung 64 dak shirangba yimya terara lir, 18 oxygen agidar aser 473 dakbo shirangba yimya kecha mali, ta paisa metetdaksü.

Nagaland nung COVID-19 alitsü akok ta temolung melemi bilemba sample 1,43,272 tendangogo. RT-PCR ajanga 77,334, TrueNat ajanga 37,902 aser Rapid Antigen Test ajanga 28,036 tendang, ta Dr Kikon-isa ashi.

Tzütsüng apu kanga mejungi raksaa lir



Mokokchung, April 24 (TYO): Mokokchung nungi Tuensang-i aoba lenmang NH-202 kübok kilometer 20.200 Moalenden yim anasa aliba Tzütsüng ayong apu kanga mejungi raksaogo aser gari

mesenzütettsüsa tia nung aliba ajitetet. Anungji, iba apu meyanglu tashi oliorartemi NH-202 lenmang ajanga mesenzütsü asoshi Mokokchung Deputy Commissioner, Limawabang Jamiri tetuyuba ka agütsüogo.

Nagaland nung Covishield vaccine peria maliba agi dose mezüng agütsüba anener

Kohima, April 24 (TYO): COVID-19 vaccine peria maliba agi Nagaland nung Covishield vaccine mezüng dose agütsüba anenogo ta Health & Family Welfare Department Principal Director, Dr Kevichusa Medikhru-i ashi.

Tang Nagaland nung dose 60,000 shi dang anünga lir ta Dr Medikhru-i ashi.

Nagaland nung Covid vaccine agitsü atema nisung aika arur saka dose peria maliba ajanga Department-i mezüng dose agütsüba maparen anena atatsü telemetba agi.

Hokolbar tashi nung Nagaland nung nisung 1,42,715 nem covishield indang dose 1,79,349 agütsüogo, ta State Immunization Officer Dr Ritu Thurr-i ashi.

Vaccine agirtem rongnung frontline workers 46,634, healthcare workers 14,053 aser arishi küm 45 ser temapur 82,028 lir, ta paisa metetdaksü.

Parnok rongnungi frontline workers 22,850, healthcare workers 9,425 aser arishi küm 45 ser temapur aser teintet rogo 4,359 densema nisung 36,634-i dose anaprong agiogo, ta Dr Thurr-isa ashi.

Nisung lakh 1 temai dose tanabuba agitsü lir saka department ket nung dose 60,000 shi dang anünga aliba agi, vaccine talila mangu tashi mezüng dose

agütsüba anena atatsü telemetbaji agi.

"State sorkari Union Ministry of Health and Family Welfare dang vaccine dose lakh 3 tashi meshiogo," ta Dr Medikhru-isa metetdaksü.

Mozüji taruba hopta tashi nung ang atongsü aser iba sülen akhi ama vaccine agütsüba maparen tenzüksü, ta paisa shisem.

"Nagaland nung COVID-19 kanga puteter anungji iba virus menatepba azüoktsü atema nisung ajaki COVID-19 inyakyim benshitsü mepishir" ta Dr Medikhru-isa metetdaksüogo.

COVID-19 ATEMA WAR ROOM CORE COMMITTEE ZÜNGSEMTEM SHIM:

Nagaland sorkari COVID-19 atema War Room Core Committee züngsemtem shimogo.

Iba luden nung chairman ji Chief Secretary, J. Alam aser züngsemtemji T. John Longkumer, DGP, A.S. Bhatia, Principal Secretary, Health & Family Welfare, Abhijit Sinha, Home Commissioner, Rovilatuo Mor, Commissioner, Nagaland, Lhouchalie Viya, Secretary, NSDMA, Home aser Dr. Kevichusa Medikhru, Principal Director, H&FW nungertem lir.

Maneni, core committee den yariteotsü atema State Level War Room nung tsünglanglen agüja

aliba ketdangsürtem züngsemogo:

Shanavas C. Principal Director, School Education, Manoj Kumar, SP (Crime), Sachin Jaiswal. Jt. Secretary, Agriculture, Ajit Kumar Ranjan, Jt. Secretary, H&FW, Dr. Nyan Kikon, SNO, IDSP, H&FW, Johnny Ruangmci, OSD, NSDMA, Home, Er. Namang Sepong Chang, Dy. Secretary to Chief Secretary, Benjamin Longkap, Asst Commissioner, O/o Commissioner Nagaland, Dr. Longri Kichu, Consultant, H&FW, M.Rollan Lotha. COO, NSRLM, RD, Er. Daniel Krocha, Deputy Director, IT&C, Er. Yanger Longkumer, Program Officer, IT&C, Rendemo, SERO, NSDMA, Kozo Lasuh, UDA, School Education & Lumdemo Kikon, UDA, School Education.

COVID-19 dak sendakba osangtsüsang atema tsünglanglen agüja aliba number tem ajanga tongteprateptsü akok.

Nagaland COVID-19 War Room Email:-

warroomnagaland@gmail.com
03702270033
03702270010

State Emergency Operation Centre (SEOC) NSDMA, Home Department.
0370-2291122/2291120
Toll free No. 1070.

Email: seoc.nsdma@gmail.com

ONGC nung mapa inyaker 2 Nagaland nung kümzük

Guwahati, April 24 (Agencies): United Liberation Front of Assam Independent (ULFA-I)-i pur aoba Oil and Natural Gas Corporation (ONGC) nung nisung asem nungi ana sepaitemi kümzükogo.

Nagaland kübok Mon district nung sepaitemi telungpurtem den khatepba sülen ONGC nung mapa inyaker ana kümzük.

"Hokolbar aonung Indian Army den Assam Rifles sepaitemi Mon nung nisung anaji kümzük. Sepaitemi maneni mapa inyakdar. Nisung anaji Alakesh Saikia aser Mohini Mohan Gogoi na lir aser iba tesem nung AK 47 ka ngutetogo" ta Army osang ajanga metetdaksü.

April 21 nü Sivasagar district nung ULFA telungpur 5-i Junior engineering assistant Saikia aser junior technician Gogoi na den junior technician Ritul Saikia nungertem pur ao.

ONGC nung mapa inyakerkem Totokchingnyu yimdaklir ket nung agütsüogo,

ta ULFA-i metetdaksü.

"Sepaitem den khatepdang par asem kümzüksü atema yimdaklir ket nung parnok agütsü. Sepaitemi nisung tasembuba indang osang memetetdaksür aser iba jagi sepaitemi pa tepset mesüra asaa miima yua alitsü ama temolung malemer" ta ULFA-i tanü sangdong ka nung metetdaksü.

Hokolbar aonung 10:00 ako nungi Honibarnep 2:30 ako tashi ULFA-i Army, Assam Rifles aser police 500 shi ka den khatep, ta parnokisa ashi.

Iba ken o dak sendakba Assam police-i ULFA den yariteper nisung 14 pua liasü.

Mon kübok Totokchingnyu anasa arem nung anepdang 2:00 ako meta khatep, ta Nagaland nung sorkar ketdangsürtemi ashi.

Iba mapang telungpur kwi liasü'ar mejangja saka osang angazükba agi ULFA aser National Socialist Council of Nagaland (Yung Aung) nungi telungpurtem meyoktepa liasü.

"Telungpur den khatepdang

sepaitemi nisung ana kümzüktet. Tasembubaji telungpur ket nung lir aser pa kümzüksü atema maneni inyakdar" ta osang ajangasa metetdaksüogo.

Centre sorkar den yimjung olemtep nung madenba Naga telungpur telokji NSCN (YA) dang lir. Iba nung Myanmar nung aliba Naga nunger timba züngsema lir.

ULFA-i Myanmar nungi mapa inyaker aser parnok ya Northeast nung NSCN (YA)-i aniba telungpurtem teloktep nung züngsema lir. Iba jagi parnok kati ka yariteper.

ULFA-I nung Major Ganesh Lahon-i anir züngsem pezüi iba mapa inyaker aser parnok ONGC ambulance ka nung par asem anir ao, ta Hokolbarnü Assam police-i metetdaksü.

Yaküm December ita nunga ULFA-I-isa Quippo company nung mapa inyaker nisung ana pur ao. Tenaji Arunachal Pradesh kübok Changlang district nungi pur ao aser anogo 100 tema ayuba sülen chiokogo.

Mokokchung nung world veterinary day amung



Dimapur, Rongchii/April 24 (TYO): April 24 nü Clark Theological College (CTC) hall Aolijen, Mokokchung nung Mokokchung world veterinary day sentong agiogo. Iba sentong ya 'Veterinarian response to the covid-19 crisis' omen nung ajemdaker agi.

Iba sentong ya Animal Husbandry and Veterinary Services Nagaland den longjemer Nagaland Veterinarians Association-i ayongzüka agia liasü.

Sentong nung Chief A.H &

Veterinary Officer Mokokchung Dr. BM. Sunep-i o jembiba mapang, world veterinary day amungba nükjiong aser iba anogo koda tongtibang iba indang lemsatepba den Covid-19 wara pokteter aliba mapang department-i shilem agiba indang metetdakja liasü. Paisa, wara pokteter aliba mapang veterinarian temi essential service contributor ama shilem agiogo, ta ashi.

Kasa mapang nung CTC principal Rev. Dr. A. Temjen Jamir-i, kaketshirtem skill

training atema college-i achaayanga veterinary project tem inyakba indang lemsatep. Paisa, tziu mopung wazüka ayutsüji meimchirtem liyonga aotsü asoshi inyakyim tongtibangtiba ta ashi.

CTC principal Rev. Dr. A. Temjen jamir-isa, iba anogo bendanga agüja sarasadema liasü. Maneni sentong nung Dr. Nemjemyanger Kubzari FM.SCBF Aliba-i tepela anküp o jembi aser world veterinary day tir osang zünga metetdaksü.

April 25 nü World Malaria Day amungtsü

Dimapur, Rongchii/April 25 (TYO): Küm shia April 25 ya World Malaria Day ama amunger aser taküm iba anogo 'Reaching the zero malaria target' omen nung ajemdaker amungtsü.

Taoba küm ter tsüngda Nagaland nung ramen tashidak den rara kanga tejakdangi ogo. State nung 2010 küm ramen tashidak agi shiranger 4959 mangaoka aliba den medemdangra 2020 kümbo nisung 12 dang liasü aser iba ya jenjang tapet agiba ajanga lir aser taruba kümtem nungbo state nungi iba tashidak ajunga samatsütsü nükjiong lir.

Iba dak sendakba nung National Vector Borne Disease Control Programme-i state kübok yimtsüng balala nung tawa Long Lasting Insecticidal Nets (LLIN) 8,45,529 angati lemtsüogo. LLIN ya ramen tashidak aser tanga vector borne tashidak nokdangtsü atema jenjang agiba rongnung tongtibangtiba ka aser state

nung ramen tashidak samatsütsü nükjiong yur aliba ataloktsü atema iba ya anogoshia shidak benshitsü nüngdaker.

Iba sentong ajangsa nüburtem dang ramen nungi jenboa alitsü atema maneni tanga jenjangtem shidak agitsü ajungshir.

Merela poktetba nokdangtsü atema item jenjangtem agiang:

1. Tzü tatena ayudak ajak nembanga ayutsüla
2. Ki temeket nung tyer tejen, chipo teraksa, marokentok mesera plastic osettem amala mamshiba osettem nangdena mayutsüla
3. Ki temeket nung tziu atsüngdenba tesemtem nembangang
4. Ki temeket nung awatsüng aser ango tziübo amala tziu tulu lira larvivorous ango metsüang. Larvivorous ango ya District Vector Borne Office Dimapur

nung angutsü

Merila-i metepba nungi jenbotsüba tasa:

1. Teti merila sü agi mbanger mejangang aser kokra National Vector Borne Disease Control Programme (NVBDCP)-i agütsüba Long Lasting Insecticidal Net (LLIN) amshiang
2. Mosquito repellent amshiang
3. Kima nung mapa inyakba mapang teka ajunga nembangba tola semang *Tashidak memonudang potetba aser treatment tembanga agiba:*
 1. Temang meta shirangba züba züba tagi
 2. Temang meta shirangra ASHA/health worker tem nem mesera anasatiba mozüki nung azü tendangdakjang
 3. Ramen tashidak keta aliba potetra mozü tagütsübatem tembanga agiang.

AR-i Mangakhi nung medical camp ayongzüka agi



Dimapur, Rongchii/April 24 (TYO): HQ IGAR (North) tawabangba kübok Assam Rifles, Zunheboto Battalion-i, Tuensang District nung Old Mangakhi yimtsüng nung April 23 nü medical camp ka ayongzüka katsüogo.

Assam Rifles nungi medical team kati angati medical

consultancy agütsüba den COVID-19 dak sendakba nung tenüngdakba osettem aser mozü angati agüja laisü.

Camp mapang yimdaklir 119 temang tendangtsüogo aser tangar aika Assam Rifles inyakyim ajanga ajangzüko. Iba camp ya healthcare aser

COVID-19 dak sendakba nung tangazükba agütsütsü atema rangloker agi liasü.

Kasa mapang nung COVID-19 wara pokteter tensa mejungi aliba mapang medical tsütsü teyari agütsüba atema nüburtemi Assam Rifles dang kanga pelaba lemsatepa liasü.

NSCN (R)-i asükhü lemsatep

Dimapur, Rongchii/April 24 (TYO): April 23 nü Kideon Yeptho (Raja Peyu) ajungbena asüba osang angazüka NSCN (Reformation) mang ayimba MIP sangdong ka ajanga metetdaksüogo.

Asür Hakiya'er jabaso asür Kideon ya Jeishe yimtsüng nungi liasü aser pa UT-1 kübok Raja Peyu ama tenzüka liasü.

Pa lanur ka aser kanga tenendak tenzüker ka liasü aser

pa asüba ajanga tebang agi ashitsü mekoki temulung züreper, ta kasa sangdong ajanga metetdaksü.

NSCN (R)-i pa tanüla tesunep nung anisüngzükdakjang ta Tsüngrem dang taochi meshizüksüba den mangyim jashi mapang pai toktsür aoba par kinungertem nem anisüngzüker agüjang ta sarasademtsür, ta MIP sangdong ajangsa metetdaksü.

Security Forces-i NSCN (R) züngsem ka apu



Dimapur, Rongchii/April 24 (TYO): Police den longjemer Security Forces temi April 21 nü Kohima jila kübok New Reserve Colony nung NSCN (R) züngsem ka puogo.

Osang tejangja angazükba sülen Security Forces aser state police na senteper iba tesem meita ao aser NSCN (R)

züngsem ka apu. Pa ket nungi parnoki rakzükrakdemtsü atema amshiba receipts teku aser Blank work permits 12 nguteta liasü.

Aija alisang den pa ket nungi ngutetba osettem ajak South Police Station, Kohima nem bendanga agütsüogo aser ken o maneni bushitsüngdangtsü.

Tuensang Jila nung aonung curfew benoker

Dimapur, Rongchii/April 24 (TYO): Tuensang district nung COVID-19 tashidak menar tanem tanemi timba akümba temulungdang yur April 22 nü DTF senden nung teletetba agiba dak ajemdaker Deputy Commissioner & Chairman, District Task Force, COVID-19, Tuensang, Kumar Ramnikant IAS-i tetuyuba kar agütsüogo.

1. April 23 nü nungi tenzüka aonungshia 7 ako nungi anepdang 5 ako tashi curfew benoktsü. Dokan, business establishments, restaurants ajak aonung 7 ako tashi nungbo shibangtsüla. Ajisüaka curfew benoker aliba mapang medical emergency, pharmacies aser essential services tembo senzusenpongsü melatsü. Iba den bendenloksema tata gari, khu abenba gari mesera gari tazüng densema tenüngdakba khu belenshiba garitem ajak aser item a c h a a y a n g e r t e m tenokdangba küboki maitsü. Curfew mapang nisung 4 dak tema adenshitsü memelatsü.

2. Tashidak agi menentsür aliba tesem tema nung lokti senden balala ajak (Social/academic/entertainment/cultural/ political /religious) takdang nung asemba nisung shilem 50 mesera nisung 200 (koba tejemba südir) dang adenshitsü melatsü. Benjungbentsü ajak takok tashi nisung kanga

ajema agidaktsütsü aser kima nisung 200 dak tema adenshitsüsa kümra District Task Force (DTF) nungi temelaba meshitsüla.

3. Kiyong ajak nung tangalen nungi arurtem meita atatsü aser DTF nem osang agütsütsü. Tanga state nungi arurtemi District Nodal Officer, COVID-19 (contact no: 8415840348) nem parnok indang jurila osang agütsütsü nüngdaker. Tanga state nungi arurtemi COVID-19 dak sendakba nung osang kar danga aginüra control Room (No.9612724367) dena tongteprateptetsü.
4. Tanga state nungi arurtemi RT-PCR/ TrueNat/ CBNAAT ajanga ghonda 72 jelia tashidak tendangba negative report magütsütera mesera result ataa lira mesera vaccine tembanga magi lira parnok anogo 10 lokti nungi pilaa alitsüla.

5. Nüburtem dang, lokti nung tetsüngda ita inyaksangshitsü, mask asemtsü, merekmeja alitsü aser temsüa lira vaccine agitsü tetuyuba agütsüogo..

Iba tetuyuba ya April 23 nü nungi benoka inyakdar aser tetuyuba sülen manidakertem Disaster Management Act, 2005, section 51 nungi 60, Epidemic Disease Act, 1897 aser IPC kübok section tapet dak ajemdaker temerenshi agütsütsü.

Manipur-i Basic Life Support Ambulances 15 angu



Inphal, April 24 (Agencies): Honibarnü Manipur nung COVID19 anema rara nung amshitsü atema basic life support ambulances 15 nguogo.

National Highways & Infrastructure Development Corporation-i State Health department nem ambulance tenla agütsü.

Manipur nung COVID19 kanga putetba mapang NHIDC-i iba mapa tajung inyakba atema pelar ta Manipur Chief Minister N. Biren Singh-i ashi aser pai ambulance lema agütsü.

"National Highways & Infrastructure Development Corporation-i Health Department Manipur nem Basic Life Support Ambulances tenla agütsüba lema agütsüogo. NHIDCL dang kanga pelaba

metetdaksür" ta Biren Singh-i ashi.

Kakching CHC, Ukhrul District Hospital, Thanlon PHC aser Haochong PHC nem ambulance kaka agütsütsü aser tanüngbaji tang atema Directorate of Health Services headquarters nung ayutsü, ta paisa ashi.

"COVID-19 wara mezüing ajurudang Manipur kübok healthcare centre aser district tem nung ambulance peria maliba ajanga tetsükdaksü aika ajuru. Ajsüaka state sorkari ambulance tasen 14 aliba ajanga wara anema takok ngua inyaktetogo" ta paisa metetdaksü.

"Tang Manipur kübok district 16 nung ambulance lir. NHIDC-i tanü tenla agütsüba dak alia Manipur nung Advanced Life Saving

ambulance 14 aser Basic Life Saving Ambulance 14 lir" ta Biren Singh-isa ashi.

Manipur nung medical oxygen peria dang lir. D-Type cylinders 1098, Oxygen Concentrator Machines 242 aser Ventilators 90 lir. Iba dakji alia oxygen generating units asem den sorkari Shija Hospitals nung oxygen production temelaba agütsüogo, ta paisa shisem.

State nung Remdesivir mozü peria dang yua lir aser ano April 25 nü vials 1000 atongtsü, ta Manipur Chief Minister-isa ashi.

JNIMS nung COVID beds 100 aser RIMS nung 52 lir. Iba dakji alia district hospitals aser nija mozü ki balala nung COVID beds lir, ta paisa shisem.

Piles Cure Centre - Kabiraj dang alakteta pelaba metetdaksür.

Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajsüaka, tang

H. Umar Chesam contact no.7627998690 / 9362359056

Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM -Yours sincerely - Shitai, Add: Kushiabill



Assam-icovishieldvaccinedose lakh2 nguogo

Guwahati, April 24

(Agencies): Centre sorkar ket nungi covishield vaccine dose lakh ana nguogo, ta Assam health minister Himanta Biswa Sarma-i tanü metetdaksü.

Tanü covishield vaccine tasen tonga aruba züingsema Assam nung dose 4,06,610 lir, ta paisa ashi.

Taküm Assam nung nisung timtiba dak COVID-19 putetbaji yashi liasü. Hokolbarnü nisung 2,384 dak putet.

Külen, tesüiba ghonda 24

tsüingda nisung 12 tashi COVID-19 ajanga süogo. Tang Assam nung nisung 12,595 anepaludar.

Assam nung nisung 15,46,787-i COVID-19 vaccine dose mezüing agiogo aser nisung 4,02,032-i tanabuba dose agiogo.

Mozü agirtem rongnung frontline workers 1,86,991, healthcare workers 1,22,168 aser arishi küm 45 ser temapur 92,873 tashi dose tanabuba agiogo.

NLFB indang prangpong-injang aika angu

Kokrajhar, April 24

(Agencies): Assam kübok Kokrajhar district nung nung gelatine sticks 87, detonators 200, country-made rifles 2, 9 mm pistols magazines 3, Chinese grenade 1, safety fuse wire coils 2, electric wire bundle 1 aser battery 4 angu.

Osang tejangja ka angazükba sülen sepaitemi Hokolbar aonung Gossaigaon nung aliba Ripu Reserve Forest mita aodang prangpong-injangtem angu.

SSB sepaitem den Assam Police-i Nobinagar yimtsüing nung gelatine sticks 87, detonators 200, country-made rifles 2, 9 mm pistols magazines 3, Chinese grenade 1, safety fuse wire coils 2, electric wire bundle 1 aser battery 4 angu.

"Prangpong-injangtem anguba ya tawa tasen tentetba telok atema tetsükdaksü tulu ka lir" ta police ketdangsür kati ashi.

Taoba cabinet minister Sangliana COVID-19 ajanga asü

Aizawl, April 24 (Agencies):

Mizoram nung taoba Cabinet Minister P C Zoram Sangliana taonung 5:20 meta alima nungi pilaogo.

Aizawl nung aliba Zoram Medical College nung Congress lennir Sangliana asü. Pa ya tezüingjang aser tanga tashidak kar ajanga kangshiba atema April 14 nü Ebenezer hospital nung anepalutsü aniok.

Ajsüaka, pa dak COVID-19 aliba putetba agi ZMC hospital-

i anir ao.

Taoba Kolasib MLA Sangliana ya diabetes, chronic bronchitis, kidney transplant, aser high blood pressure ajanga timtema anepalua liasü.

2013 nung Congress candidate P C Zoram Sangliana-i Kolasib assembly menden nungi takok angu.

Mizoram nung Citizenship (Amendment) Act anema lungkak aitba nunga pai tongti süa shilem agia liasü.

IndiGo-i Kolkata-Shillong tayimtsü anener



Shillong, April 24

(Agencies): IndiGo-i Kolkata aser Shillong tsüingda senzüba tayimtsü Hokolbar nungi tenzüka anogo 8 atema anenogo.

IndiGo-i iba ya kechi atema inyaker kuli magütsü saka Shillong Airport authority-i COVID-19 tensa nung ajemdaker agiogo ta ashi.

"M/s Indigo Airlines April 23 nungi April 30, 2021 tashi Shillong nung maparen anenogo" ta parnoki Twitter

nung metetdaksü.

Tayimtsü mapang melenshiba aser ticket aliba sen meyipa agitsü atema passenger temi company den tongteprateptsü atema mepishia metetdaksü.

Indigo indang tayimtsütem Kolkata nungi Shillong-i dang arur.

COVID-19 ajanga ita 10 shi ka shibanga ayuba sülen taküm February ita nungi IndiGo-i maparen tenzüka liasü.

Livingstone Foundation International

Affiliated to CBSE & Cambridge International (ISO 9001 : 2008 Certified Institute)

Thahekhu / Kevijau, Dimapur - 797112 : Nagaland

e-mail: livingstone.nagaland@gmail.com

☎ : (03862) 244203 / +917005996092 / 93



**ARTS
SCIENCE
COMMERCE**

ADMISSION OPEN FOR GRADE XI (CBSE) 2021- (PROVISIONAL)

"Proven to make a difference for every child that steps in"

- ❖ LFI strives to provide the need of the hour education and skills through holistic approach because we understand that change is constant and inevitable. LFI also strongly believes in holistic Education that thrives for an all-round development! As such we bring to you complete guidance and equipment necessary to give Wind to your Wings.

SALIENT FEATURES

- ❖ Admission start from 28th April 2021 onwards, forms are available at the School Office between 9:00am. and 1:00pm.
- ❖ Regular classes will commence from 3rd May 2021 with proper SOP guidelines.
- ❖ 100% Concession in both Hostel & School Fees will be granted to TOP3 RANKERS from all recognized Boards across India and abroad.
- ❖ 50% Concession in both Hostel & School Fees will be granted to other TOPPERS.
- ❖ 25% Concession in both Hostel & School Fees will also be granted to students with excellent flair in Sports, Art, Music & other such skills.

"YOUR KIDS OUR PRIDE"



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 25, 2021

Tsüngrem o mangashibawara

Asenok rongnung khen khen jashitepdang mesüra tezü atsütepang o mejembitepi akümer. Aji oda, jembiner saka mejembir aser jembiake melangzüker, ibaji ajak asoshi timtem tulu aser o mejembiteper asünungji külem sentong meyanglutetter aser temulung nung bilemba mangur, anungji takoksa ajurur. Ibaji mesüka kodang asenoki Tsüngrem kanga jashidaktsüdir, Pai asenok den mejembir. Aji oda, asenok den Tsüngremi mejembiba mapang ya Tsüngremi asenok merenshir ta asenoki angateta temulung meyipra, ashiko Tsüngremi asenok dang taochi sayutsü aser jembitepang. Amos ainker mapanga Israel nungertemi Tsüngremi Mosa ajanga agütsüba ozüngtem ajak to kata mebenshiteti aküm. Tanga aibelentemjibo yutsü, amongnua junga memongtet, kechiyong amongnü amongba jagi parnok mapa (business) nung kanga takoksa angu. Takar aser tulurtemi rongsen kanga benpu, anungji parnoki sensaker aser tilartem shilem dena rakzüka agi aser shingaia seret shitak mamshi, anungji Tsüngremi parnok dangi temerenshi yoktsü osang agütsü. Item temerenshitem rongnungji yimti yimdong tasü mang agi asüngtsü aser asüpila sentep (funeral service) junga melitetsüba tetsübütsü timtem mapangtem ajurutsü indang shina liasü. Iba ama timtem tekangshi mapang nung nisungtemi Tsüngrem den jembinütsü mesüra shiner mangdang mesüra ainker ajanga Tsüngrem tebilemba aser taginüba metettsü, saka Tsüngrem ola marutsü aser mangashitsü ta Amos 8:11 nung shia lir. "Ajiang, anogotem arudar ta Kibuba Tsüngremi ashir. Ne alima nung yawara yoktsü, chiyongtsü aser tzü tajemtsü manguba wara ka masü, saka Kibuba o mangashiba wara ka." Amos ainker o den ya tanü asenok taküm jenjang aser tensa mapang ya medemdanga, akhi tejen Lai putu nung Amos ainkeri shinba o ya tang asen lima nung asenok dak ataloker amai atalokdagi. Asenok taküm aser kibong nung shisabolua aika lir. Ano, Covid-19 tashidak wara agi asenok amokmerener, nisung asür saka asenok mulung anisüngzüka asüpila sentepa melitetter. Asenok rongnung tanü ochimashi aser tashiyim mapatem anema ainker o jembir alitsüla ta ajungshiteper, saka majung dang majunga ta nungsen agia Tsüngrem nungi o belenzüka ashir ainker mali kümogo, kechiyong ainker o ji asenoki jembinüba agi jembitsü makok, Tsüngremi magütsüra mejembitettsü. Aji oda, ajak tamanger saka Tsüngremi agütsüba o shitak belenzüka jembir kata mali akümba tia ya tanüla nung akongba yawara mapang lir. Asenoki tenla kidang Tsüngrem o jembiba nung temulung masür, kechiyong Tsüngrem o jembirtem nem Tsüngremi Pa o magütsür. Tsüngrem o yabo asen shi tejangraba agi angatetnüyonga aser kanga junga rasaa jembinüyonga Kibur Tsüngremi o ji magütsüra mejembitettsü. Aji oda, tanü asenok taküm aser kibong nung dang masü saka tenla kidang dena shitakba Tsüngrem o mangashiba wara agi tongogo. Aji oda, Tsüngrem o tarok rateta ashiba anganer saka tashir mali, Laishiba nung shia aliba angatetner saka tesayur mali, Tsüngrem o angashidak makaba yawara mapangji tang asenok tensa mapangba ya lir. Atangji, asenok aikati Tsüngrem o mangashiba wara agi atongbaji memeteti alitsüa akok, ajisüaka asenoki sarasademner saka sarasademtsü onük marur, Laishiba azünger saka mangatetter, Tsüngrem o tajung anganer saka tashier mali, Tsüngrem o kanga junga rateta jembiner saka mejembitet benjadoker ta asüba tensa tiaji Tsüngrem o mangashiba mapang asütsü. Joko, lia lia asenoki tanüla nung asentenshi sentong ayonga aginütsü saka Tsüngrem osang abener malitsü. Ibayongji, Tsüngrem o talubo alidang asenoki Tsüngrem o angatsü aser Tsüngrem o jembitsü jangraa sentep alibatemtoa tanem-tanemi anendagi, kechiyong Tsüngrem o marur asünungji tejembitsü maka kumadokogo. Iba ama tanüla chiyongtsü mengutet shisabolua aliba mapang, taochisang Tsüngremisa ashir, "nü mulungjang ajak agi, nai ni bushira, nai ni angutsü." Yerimias 29:13.

OLEMSABANG

NABOT LUNG AGI ONSETA SÜDAKTSÜBA AMA DELHI NUNG ALUYIMERI AJURUR

~ Wati Longchar, Serampore

Aluyimertemi anüi pua, tzünglui ajaa mapa meranga inyakba ajanga meimchir ajak tepok sünga lidaktsür. Koba lima aluyimba nung tashi ita lidir, yangji yimchiyimjung aser tesünap alir. Mezüngbuba Chubatem kaket tapu 21 nung, Ahab chuba, Samaria lima BC 897 shi yimsüsüba mapang Nabot, tsükmenatzü atsüki mechi, chuba aser kinungtsü nati tiyazü asa-lentong yanglua tamangba yimsüi metendakja saka lokti nem atakatem bener arutsür, aser anema noktaker ama kümdaktsür, Nabot lung agi onseta südaktsüba otsü zülua lir. Iba putu nung lung agi onsetabaji yimkong dangi atakatem bener arutsür dak dang yamaji inyak. Tanü Delhi nung aluyimertem anogo 130 tema longkak aitdagi. Political party aitsütepa, ano tamangba yimsüi metendaktsüs? atema PM Modi Sikh tekülemki oa külema aser Republic Day nung India yimli mezüngmeshir ta tonglokja aluyimer karbo süogo, kar tepuokdak lir aser kar kanga mejungi yirur lir. Shiba ajangzüktsü asoshi aluyimba temzüng tasenji yanglu? Kechiba aluyimertemi tim masü ta noktaker? Kechiba Government-i ozüngji agientsü memulunger?

India nung aluyimer

India nung nüs?ng 1.3 billion lir, tetezü noklang nung 65% aluyimer aser alu dak metaloker alirtem. Parnok rongnung 80% (million 700 dak tema) hectare 2 den tajemba alu akartem. India nung küm shia aluyimer aika sentsüh magütsütetba aser alu junga maruba ajanga pei sasa tepsetta asür. The National Crime Records Bureau of India (NCRB) nung sangdongba agi 1995 küm nungi yaküm tashi nung aluyimer 2,96,438 pei sasa tepsetta asü ta ashir. 2019 küm nung 10,281 pei sasa tepsetta asü ta sangdongogo. Tetezü, anogo shia aluyimer 28 asüba sayur. Tasürtemji Maharashtra, Odisha, Telangana, Andhra Pradesh, Karnataka, Madhya Pradesh, Gujarat, Chhattisgarh nungi tiemba. Aluyimer shirnoki nüburtem ajunga tepok sünga yutsütsü mapa meranga inyaker parnok timtem-toushi nungi kümzüka yutsütsü ozüng takang akatsüla aser asa-lentong tajung akatsü nungdak ta sayur.

Aluyimer longkak aita

Government-i aluyimba dak sentakba nung ozüng asem yanglu. Itemji (a) Farmers' Produce Trade and Commerce (Promotion and Facilitation) Act 2020 (FPTC Act) (b) Farmers' Empowerment and Protection Agreement on Price Assurance and Farm Services Act 2020 (APAFS), (c) Essential Commodities Amendment Act (modified the Essential Commodities Act of 1951 for agri-food stuffs). Governmenti ashir, item ozüng ajanga aluyimba maparen tajungba akümtsü. Alu nung züsentetba ayoktsü asoshi ka küma (centralized) asütsü aser ayoktsü; ibai ajanga aluyimertem rongsen ketzüng renloka akümtsü ta ashir. Saka aluyimertemi iba ozüng ajanga parnok sensak tia yoktsü, cooperate tulu den Government nung inyaker shirnok som sür inyaker, aser tetsüngda nung shishilembar (middle men) dang ajangzüktsü, aluyimer sentsüh tiemba akümtsü aser küm ishika tsüngda nung alujia agiadoktsü. Ibaji dang masü aluyimeri kechi metsüjang yokner aji meyuoktettsü. Corperate-i kechi metsü yoktsü aji ashitsü aser jenjang kwi yong ayoktsü aji parnok mulung asütsü. Par lu nung alar amai inyaktsü. Iba den super market nung itemji ayoktsü aser aluyimertem yimdong aser bazar nung süngolio ayoker dang nüburtemi malitsü ta sensena bilemer. Anungji aluyimertemi itemji magizüktet aser center government-ia magientet ta parnok tsüngda tatsütep adoka lir.

Iba longkak aita ya aluyimer ishikati Punjab aser Haryana nungi August ita tenzük. Saka September ita nungibo India ajunga nung aluyimertemi iba ozüng asem anema longkak aiter. Government-i police, tzü, rubber injang, ajok amshia nokdangtsü merang, saka aluyimertem aika November 23 Delhi aser temeküt tonga aru. January 26, 2021, India Republic Day amungba anogo, yimjung nung Delhi tesem kar nung tractor parade asütsü temelaba angu. Aluyimer telok nung madenba nisung kar tebilemba tamajung nung aden ta aluyimertem lenir aija shiogo. Tia maka nisung kari tashiyim amshia Red Fort-i police-i atsü atsüa aliba nungpoka ia Nishan Sahib (Sikh religious flag) aser aluyimer telok wako, Red Fort nung onoki farm law magizüker ta sayuba temaitsü asong. India yimli anema inyaker tem ta aija, aluyimer lenir aika tepuokdaki anir ogo. Tractor parade mapang police 400 shi yiruogo, aser aluyimera aika yiru aser nisung ka asü ta sangdongogo. Delhi yimti nung dang masü, India tesem aika nung aluyimer longkak aita osang angashir. Osang kar ajanga ashiba iba longkak ait tenzük aluyimer 214 shi September nungi 8 February tashi nung süogo ta ashi. Manenisa longkak aita ao nungbo aluyimer aika asütsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Karnataka nung lokti kati Pastor Sanjay Bhandari dak azük



Karnataka nung Hindu nunger telok kati Pastor, Sanjay Bhandari kidang nungi anizüker yimdong süa anir jajaba noksa nung angur.

April 24, 2021: Tawa India kübok Karnataka state nung Hindu nunger telok kati pastor ka dak mejungi azükba sülen kangshia pa nem Hindu nunger külemküja benshidakja liasü, ta Arogo lenir kari metetdaksü.

April 5, 2021 nü Pastor Sanjay Bhandari aser pa kinüngtsü na kinünger ka semdangtsü atema Halaga yimdaki oa aliba mapang Hindu yimsüa alia amangertemi Pastor Bhandari ji kidang nungi atsüzükba sülen pa dak azük. Iba sülen pai iba yimdak nungji Amongnü tekülem sentong agiba hall kati pa atsüer ao.

Pastor Bhandari-i özüng alema Hindu nungertem Khristan yimsü dangi meyipdaksür, ta tai tonglokja parnoki pastor dak azük.

Osangbener den jembidang

pastor-i ashiba agi, "Parnoki ni aser Yisu Khrista atalaja jembia aser kü dang 'Jai Sri Ram' ta shiang, ta shia kü dak azük. Parnoki kü miim oset, tejak aser teku densema temang shilem ajak nung azük, ni kü kinüngtsü'er aianu Khristan yimsü dangi meyipdaksütsü meranger, ta parnoki kü nem tai tongloksü. Ni parnok dang iba ki ya kinüngtsü teno'er ki lir, parnok ajak Khristan aser özü Arogo nung züngsem lir ta ashi."

Tekülem sentong agiba hall tonga aruba sülen Hindu nunger jagi kangshia pastor nem Hindu nunger külemküja aika benshidakja liasü. Iba sülen parnoki Pastor Bhandari aser pa kinüngtsü naprongla tenütsü nung 'Kumkum' nülöksü.

Osangbener den jembidang pastor Bhandari'er Arogo nung

züngsem, Santosh Satpute-i, "Parnoki Pastor Sanjay shi aser shisatsü naprongla nung kanga reshikangshiogo. Pai memelungi parnoki pa nem kangshia Hindu nunger külemküja benshidaksü. Pa reshikangshibaji o agi rasa-a ashitsü makok," ta metetdaksü.

Iba sülen Hindu nunger jagi Pastor Bhandari dang na joko iba tesemi marutsüla aser Tenla kiji shibangtsüla, ta tetuyuba agütsü.

Yangji aliba Khristantemi iba tatalokbaji police nem metetdaksü saka police-i ken o mebenok. Pastor atema ken o jembitsür kati police ketdangsertem nem iba tatalokba metetdaksüba sülen ang ken o benok, ajisüaka ang tashi police-i aibelener shinga mapu.

Khristantem dang India nunger atema sarasademtsü ayongzük

April 24, 2021: India nung coronavirus wara ano tamajungba akümtsü, ta mongintemi tekümdangtsü sangdongba mapang nung UK nung Khristantem dang India nunger atema sarasademtsütsü aser sorkar nem shisa agüjang ta sarasademtsütsü ayongzük.

Brihostibarnü India linük nung anogo ka kija nung nisung 314,000 dak coronavirus tashidak putet aser nisung 2,000 dak tema asü.

Brihostibarnü osangbener den jembidang Christian charity telok South Asian Concern nung Chairman, Ram Gidoomal-i, iba tensa ya kanga majung aser India linük nung health system chirepadokogo, ta metetdaksü.

Ram Gidoomal-isa, "Nisungtem ambulance nung süadoker, kechiyong shirangertemji menor ang ani-i arur. Tatalokba ka nungbo hospital pezü tashi-i ambulance nung shiranger anir aruba magizüki liasü. Ghonda pezü sülen nisungbaji ambulance nung süadok. Ano tanep Uttar Pradesh nung senior judge kati ambulance service meshia liasü, saka ambulance tonga arudangbo pa kinüngtsü süadoker liasü," ta metetdaksü. "Iba ya tejashitsüka lir,

tasü mang rongdoktsü atema süng peria mali. Tasü mang rongdoktsü atema nisungtem tarensena nokdaker atar. Talisa Hindu nunger kibongtemi tasü mangji rongdoka indoker aser ibaji tekaratiba nung inyakner. Ni o agi rasa-a ashitsü makoker. Temelung raksatsüsa lir," ta pai ashi.

Epidemiologists aser health tsütsü mongintemi ashiba agi, coronavirus variant tasen ka ajanga iba tashidak ya mela-mela prokshir, iba denji külemi hospital tem nung staff peria maliba den oxygen peria maliba agi shirangertem kanga timtemer.

Tan hopta UK Ato kilonser, Boris Johnson-i India semdangtsü sentong liasü, saka tang linük nung coronavirus tali prokba agi taoba hopta pai iba sentong thinena liasü.

Hokolbarnü UK Ato kilonseri, UK-i India nem mozü den nüngdakba osettsüset kar teyari agütsütsü tebilemba lir, ta metetdakja liasü.

"India nunger nem teyari agütsütsü, talisa ventilators agütsütsü tebilemba lir. British nunger manufacturers ajanga tangbo onoki linük aika nem ventilators agütsüdar," ta pai ashi.

South Asian Concern telok yagi India nung hospital tem aser Arogotema yaria arudar aser Gidoomal-i ashiba agi, tang India nung Arogotemi akokba tashi teyari agütsüdar.

"Onoki Uttar Pradesh nung aliba hospital ka yaridar, aser yashi nisung kari iba hospital nungji oxygen peria mali ta metetdaksüogo. Iba hospital nungji Tenla ki-a ka lir aser yangji pastoral training school lir. Iba hospital nung director, pa kinüngtsü aser tanurtem dak coronavirus putetogo," ta metetdakja Gidoomal-i iba hospital atema sarasadmejang ta mepishi.

"Vaccine manga-a alirtem dak temeim alitsü atema asenoki vaccine programme atema sarasademdi. United Kingdom ama linüktem nungbo nütsü ng shilem 60 dak tema nem vaccine agütsüogo. Alima nung alir ajak nem vaccine magütsüra asenok maneni lendong nung lir, anungji asenok tsüngda yariteptsüla. Asenoki temeim agi teka salad. Asenoki sorkartem nem shisatsü agüjang ta sarasademtsüdi, kechiyong linük ka kijai makokbaji linüktem longjemerbo akoktsü," ta pai mepishia metetdaksü.

ANO GO ABEN TSÜNGREM DEN

AJAK DANG TAREMZÜKJI TAJUNGBA

".....aser taremzük tanelaji asüküm tanela dang tajungba". Sayu 7:8b

Alima nung nisung dak shisatsü balala keter asor, kar dak taremzük, asüküm, aser kar dak mezümekümba tanela alir. Nisunger yimya tsütsü nungi reprangra timba ka taküm nungji asüküm jakla nem yimsüsüdaktsüba angur, aser lia aodang meilungi iba asükümba tanela jagi moksepdakja medemera melii kümdaksür aser tesü tia nungbo taküm nung maksü aser tejashi tulu bener arutsür. Tsüngrem O-i ashir, "Nisung ka asükümi pa teküboki anizüktsü". A. Shin 29:23a. saka taremzük tanela akar den tembar kümnüba aika lir, kechiaser la dak temetsüdaktsü long kecha maka mesüra tarak kecha maka nung la reprangtettsüsa tashi mait shisatsü kecha mangur.

Yisu-i iba taremzük tanelaji Pa sobutsü tajungtiba südakja iba tangatetba tanela nung aliba ajanga Pa dak tai temenen mapajenti Yihuda nunger Farisi aser tezülurtemi inyakaka item ajakji taremzük tanela nem kokdaksü. Asen lenmang ajak nung anidaktsüra, aseni tangar tsüngdang tatishitsü tajung kuli akaba taküm ka sütet.

SARASADEM

Temeimba Tsüngrem mapang ajak nung taremzük tanela nem kü taküm anidaktsütsü ni nangzüker. Amen

LATTER RAIN REVIVAL TELOKI MANENI SARASADEMTSÜ AYONGZÜKER

T. KEN 77:1; T. KUNEM 20:4

Anogo: April 25, 2021 Mapang:- 5:00 AM nungi Egypt nunger alar talenba nungi salar pelaseta Kanan atongtsü lenmang nung jajaya alidang ano tanabena Pharao Chuba mit adoka Israel nunger areshia aruba mesüka tanü Covid 19 wara apusoba osang den tatalokba asenoki angur. Saka Tsüngremi Pharao aser pa sepaitem koma samatsü yamaji pa nübur tsüngdang laotsü, ta asenoki amanger. Anungji arung sarasadem tashi ulushidi aser tashi itshidi, tongpang takokbaji asen tematiba Tsüngrem meyong lir aser asenok Pa akümbok nung alitsü.

1. Tamasa iba anogo tajung moatsüba den asenok ajak longjema sarasademtsü maongka agütsüba asoshi Tsüngrem nem tenüngsang aguja sarasademdi.
2. Tesüiba mapang asenoki sarasademba Tsüngremi langzüa kümzüka Pa taochi nung aniba asoshi tenüngsang agutsüdi.
3. Tang koba wara tanaben asenok tangi arudagi iba nungi meimchir ajak kümzükan ta sarasademdi.
4. Asen Naga nunger missionary tem alima ajungalen prokshia Pa mapa inyakertem ajak tensa aser tashidak wara tamajungtem nungi kümzükan ta sarasademdi.
5. Maneni asen Aor aser Naga nungertemi Tsüngrem jashidaktsübatem asoshi tatok meshia sarasademdi.
6. Bendanglen alir asen Naga nunger kibongtem aser lanurtem ajak alima lendongtem aser wara nungi kümzüka yujang ta sarasademdi.
7. Tsüngrem mapa inyakertem asoshi Pa wadang tuluba inyaktsü lenmang sadema lapokjang ta sarasademdi.
8. Iba Covid 19 wara mapang nung Tsüngrem tenzükertem, talisa Arogo nung lenirtemi amangbapurtem maneni tanula nung tashi ita anitsü asoshi tashi aser shisatsü Tsüngremi tali agujang ta sarasademdi.
9. Asen limai asentenshi tuluba ka yaktasa yokang ta maneni sarasademdi.

Tayonger tenü ng nung;

Rev. Dr. L Kari Longchar

Rev. C Teyong Kichu

OLONG PAITEP # 5792

1						2				3
								4		
5		6				7				
8										9
								10		
				11		12				
		13								
14						15				
			16							

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 5791 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

KOMA SÜLA TELANGZÜBA**Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?**

Kümdanga alir tashi kümzükan, tashi mangai mekümdangi alir südakjang, kechiba süra asen Nagaland nung Covid-19 tenüng nung oset ajak taoksatsü jenjang atur aser tsümar bussiness dang alanger.

-M.A.Ao 4th mile

Ita masü anogo ka-ah lockdown asütsü menungdaker. Pioneer nungja aginertemi anir SOPs sülen manidakba dang masü yimsüsürtemia zübara doktsüba agi dang-ashi SOPs den shidak litetra COVID/19ji tsübuttsü menungdaker. Kechiyong Rom10:5, 13:1. Asen den lir.

- C.R.pongen

Lockdown kisüng agia tashidakji matongtsü ta masüji joko alima telungi malutsü aser kija taküma liteta otettsü atema joko pei sasa pei taküm tali kümdangtsüba dang ta angatetdi.

-SMS

Lockdown ajanga economy nung kanga takoksa angur anungji SOP shita amshia merükmeja kümdanga alitsü jiang kanga tajungba.

-M Ben Ao

TANÜBO NAI LANGZÜANG**Q. Koba küm Indo-Tibetan Border Police tenzük?**

A.24 October 1962

B.24 October 1965

C.25 October 1962

D.25 October 1965

===== (Taruba adok nung onoki langzütsü)

YASHI ADOK TELANGZÜBA : 142

AO OSHI ANGAZÜKDAK:

TANÜ ANGAZÜKTSÜBA OJANG

Belem

(v) mapa tali inyak, aniset (tire)

* Onok alu lenmang atudang kanga **belem**.

Bilem

(v) temulung nung shisadang (think)

* Ne pa nisung tajunga ta **bilem**.



Tir Yimyim

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm :
4. Class :
5. School :
6. Talidak :
7. Salem osang :

**NAI-A YA METETTER MA?****IMMUNE SYSTEM TASHIITA ALITSÜ ATEMA CHIYONGTSÜ KAR:**

1. Citrus fruits (Naring)
2. Red bell peppers
3. Broccoli
4. Garlic
5. Ginger
6. Spinach
7. Yogurt
8. Almonds
9. Sunflower seeds
10. Turmeric
11. Green tea
12. Papaya
13. Kiwi
14. Shellfish
15. Blueberries
16. Dark chocolate
17. Spinach

SUDOKU # 5835

	8				7	9	3		2	5	1	6	8	4	7	3	9
	1		9	8	5				7	4	8	9	3	5	6	2	1
	6			7			1		3	6	9	2	1	7	5	4	8
	4		7	2		3	6		1	9	7	5	2	3	4	8	6
3	5		8			1	7		5	8	3	4	6	1	2	9	7
		7	3		1		8		6	2	4	8	7	9	3	1	5
1			4	6	7	8		9	8	7	6	1	4	2	9	5	3
5	9			3			2		9	3	2	7	5	8	1	6	4
	7		5			6	3	1	4	1	5	3	9	6	8	7	2

TELANGZUBA # 5834**OJANG LUTEP # 5378**

- ILEMTEBBA :
- TONMAG :
- RYU :
- ZTEÜ :
- ANGBTAA :
- ANAJGA :
- JUNANOI :
- NTOSENG :
- NGAJUA :
- KSADRAOK :

OJANG LUTEP TELANGZÜBA # 5377

**PEII DANG SHIA METETA LIRBO TANGAR TEYARI
MENÜNGDAKTSÜ AMA MEJEMBITSÜLA**

TAN HOPTA ATEMA - KOMA SÜLA ?**Q. Covid-19 tashidak wara agi senzusenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla ?**

Olong 20 shi nung April 23, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.

Justice NV Ramana-i Chief Justice of India (CJI) tenangzükba agi



New Delhi, April 24, 2021: Honibarnü Rashtrapati Bhavan, New Delhi nung India Tir, Ram Nath Kovind-i ketdangsüa Justice Nuthalapati Venkata Ramana nem Chief Justice of India (CJI) tenangzükba agidaktsüba noksa nung angur.

New Delhi, April 24 (Agencies): Honibarnü Justice, NV Ramana-i Chief Justice of India (CJI) tenangzükba agiogo; pa linük nung 48buba CJI asütsü.

Honibar anüngdang 11:00 ako nung Rashtrapati Bhavan nung India Tir, Ram Nath Kovind-i ketdangsüa Justice Ramana nem tenangzükba agidakja liasü.

CJI, SA Bobde Hokolbarnü mapa nungi anizüngzükba sülen Ramana-i pa melener.

Andhra Pradesh High Court nungi Chief Justice of India inyaker mezüngbubaji Justice Ramana kümogo. Justice Ramana-i kümsük küm 1 ser ita 4 CJI inyakba sülen sangküm

August 26 nü iba menden nungi anisüngzüktsü.

Justice Ramana ya 1957 küm August 27 nü Andhra Pradesh nung Krishna district kübok Ponnayaram yimdak aluyimer kibong ka nung aso.

Pa kaketshir asüba mapang nung pai aluyimertem aser industry nung inyaker tem tebilemtsü onük balala atema inyaka aru. Iba sülen pa Telugu osangkaket ka nung mapang tatsüka journalist inyakba sülen legal tsütsü ajemoka liasü.

1983 küm February ita nung pa lawyer aküm aser Andhra Pradesh High Court nung inyak. Iba sülen pa Central aser Andhra Pradesh Administrative

Tribunals nung inyaker tatamsa Supreme Court nung justice inyaka liasü.

Pa sorkar organizations aika nung panel counsel inyak aser Hyderabad nung aliba Central Administrative Tribunal nunga Additional Standing Counsel for Railways inyaka liasü.

2000 küm pa Andhra Pradesh High Court nung permanent judge shim aser 2013 küm September ita nung Delhi High Court nung Chief Justice aküm, iba sülen 2014 küm February 17 nü Supreme Court judge shima liasü.

Pa Supreme Court nung küm 7 judge inyakba mapang nung pai obendang 156 agüja liasü.

India nung ano nisung 3,46,786 dak Covid putet aser 2,624 asü

New Delhi, April 24 (Agencies): India linük nung ano nisung 3,46,786 dak coronavirus putetba sülen linük nung coronavirus case ajak agibo 1,66,10,481 jungogo aser tang teshirangdakpur lakh 25 dak tema jungogo, ta Honibarnü Union health ministry-i metetdaksü.

Tang linük nung coronavirus tashidak agi teshirangdakpur 25,52,940 lir aser ibaji coronavirus caseload nungi shilem 15.37 lir.

Tesüiba ghonda 24 nungsa coronavirus tashidak agi nisung 2,624 süogo aser ibaji densemabo linük nung iba tashidak agi asür ajak senteper 1,89,544 jungogo, ta Honibarnep 8:00 ako nung Union Health Ministry-i metetdaksü.

Linük nung coronavirus agi shiranger anepba shilem ano tajemba küma 83.49 dang kümogo (nisung 1,38,67,997 anepogo) aser iba tashidak agi shiranger asüba shilembo 1.14 dang kümogo, ta kasa osang ajanga metetdaksü.

India nung Yaküm September 16 nü coronavirus case lakh 50 ajung, December 19 nü coronavirus case crore 1 ajung aser taküm April 19 nü crore 1.50 ajung.

Indian Council of Medical Research (ICMR)-i ashiba agi, tang tashi nung India nung coronavirus tashidak jangjatsü atema samples ajak agi 27,61,99,222 tendangogo aser iba nungji April 23 nü samples 17,53,569 tendangba densema lir.

Tesüiba anogo ka tsüngda

India nung iba tashidak agi asürtem 2,624 nungji Maharashtra nungi 773, Delhi nung 348, Chhattisgarh nung 219, Uttar Pradesh nung 196, Gujarat nung 142, Karnataka nung 190, Tamil Nadu nung 79 aser Punjab nung nisung 75 asüba densema lir.

Tang tashi nung linük nung iba tashidak agi nisung 1,89,544 süogo.

Linük nung iba tashidak agi nisung timtiba asüba linükji Maharashtra (63,252) lir; Karnataka nunga iba tashidak agi nisung 14,075 süogo, Tamil Nadu nung 13,395, Delhi nung 13,541, West Bengal nung 10,825, Uttar Pradesh nung 10,737, Punjab nung 8,264 aser Andhra Pradesh nung nisung 7,579 süogo



April 24, 2021 nü West Bengal nung Birbhum district kübok Bolpur nung West Bengal Chief Minister, Mamata Banerjee-i video conferencing ajanga tanüngba election shilem ana atema nüboyimba noksa nung angur.

Uttarakhand nung rürjep anenzüka aluba lendong nung nisung 8 asü

Gopeshwar, Rongchii/April 24 (Agencies): Hokolbar aonung Uttarakhand kübok Chamoli district nung India-China arrtsülen rürjep anenzüka aluba lendong nung Border Roads Organisation (BRO) nung inyaker 8 süogo; kasa lendong nungsa nisung pezü yiruo, ta ketdangsertem osang ka ajanga metetdaksü.

Niti Valley kübok Sumna area nung Hokolbar aonung tasü mang ana mezüng anguba sülen Honibarnep ano tasü mang trok nguogo, ta District Magistrate, Swati Bhadauria-i metetdaksü.

Iba lendong nung yirua alir nisung pezü kümzükogo aser maneni kümzükba maparen inyakdar, ta Joshimath nung Uttarakhand Chief Minister, Tirath Singh Rawat-i metetdaksü.

Hokolbar nikongdang rürjep tulu anenzüka aluba mapang nungji BRO sepai 391 mapa teinyakdak liasü, aser parnok aika iba lendong nungi kümzüka

Indo-Tibetan Border Police (ITBP) camps tonga aruogo, ta Chief Minister-isa metetdaksü.

Malari yimdak nungi kilometer 25 shi pilar aliba Sumna area nung iba lendong atalok. Iba tesem ya Girthigad aser Kiogad ayong na ajurutebpa tesem anasa lir.

Taküm February ita nunga Chamoli district anasa rürjep anenzüka aluba lendong nung nisung 80 asü aser nisung 126 samaa liasü.

Iba tesem nung rürjep kanga alaba agi kümzükba maparen nung timtem agütsür; tang ITBP, NDRF aser SDRF sepaitem senteper kümzükba maparen inyaker, ta Rawat-i metetdaksü.

Union Home Minister, Amit Shah-i kümzükba maparen nung akok tashi pai yariteptsü ta shiogo, ta Rawat-isa metetdaksü.

1991 küm nunga Sumna tesem nungsa rürjep anenzüka aluba lendong nung ITBP sepai 11 asü.



April 24, 2021 nü Minister for Home Affairs for State, G Kishan Reddy-i Hyderabad nung aliba COVID-19 centre ka semdangba mapang tangokba noksa nung angur.

Oxygen maliba agi Amritsar nung aliba hospital ka nung nisung 6 asü

Amritsar, April 24 (Agencies): Honibarnü Amritsar nung aliba nija hospital ka nung oxygen supply maliba agi coronavirus tashidak agi shiranger pongu densema nisung trok asüba sülen Punjab ketdangsertemi iba tatalokba bushisüngdangtsü tuyuogo.

Neelkant hospital Chairman aser Managing Director, Sunil Devgan-i, "District administration dang yariang ta aiben shiogo saka shingaia meyari," ta metetdaksü.

Paisa, "Oxygen agi meperiba ajanga tetsür ana densema shiranger trok süogo," ta metetdaksü.

Hospital chairman Devgan-i ashiba agi, shiranger trok asüba sülen ang hospital nem oxygen cylinders pongu agüja liasü.

Paisa, oxygen suppliers tongti aseme sorkar hospital tem nem tama oxygen agütsür ta onoki dang shiogo; nija hospital tem nem oxygen magütsütsü atema oxygen units nung police aika mapa lemezükja lir, ta metetdaksü.

Ajisüka Medical Education Minister, O P Soni-ibo, iba hospital nungji oxygen agi anüngba osang tejangja magütsü, ta ashi.

"WhatsApp group ka nung dang administration nem tongmelang osang ka dang metetdakja liasü," ta Minister-i ashi.

Iba tatalokba sülen Punjab Chief Minister, Amarinder Singh-i Amritsar Deputy Commissioner (DC) dang pa leniba nung iba tatalokba junga bushisüngdangtsü tuyuogo.

Chief minister-isa, mezüng bushisüngdang ajangabo iba hospital-i nija hospital tem dang tuyuba ama meinyak ama reprangteter, kechiyong nija hospital tem dang oxygen peria melira shirangertemji sorkar medical colleges-i yokang ta metetdaksür liasü, ta ashi.

Tang Neelkant hospital nung atalokba amaji linük nung aliba nija hospital aika nung oxygen peria maliba agi coronavirus agi mejungi shiranger aika mekümzukteter.

Kulitem ajanga submarine tzüym telungi lur alitsü ta amanger: Indonesian navy



Indonesia Navy ship-i KRI Nanggala-402 submarine samar bushiba noksa nung angur.

Jakarta, Rongchii/April 24 (Agencies): Indonesia indang navy-i Honibarnü ashiba agi, samara aliba submarine nungi ngutetba osettem ajanga, iba submarine nung nisung 53 mener tzüym telungi angemoka aiba kuli agütsür, aser taküm alirtem ngutettsü timla mali.

Navy Chief of Staff Adm. Yudo Margono-i Honibarnü, teküzmükertemi torpedo straightener, periscope meyuba grease bottle ka aser sarasadem dang amshiba pakti densema parts aika ngutetogo, ta ashi.

"Submarine nungi asütsü ta kuli tejangja ngutetba sülen tang submarine samara bushia aliba ya tzyim telungi angemoka ir alitsü ta bilema inyaksangshidar," ta Margono-i osangbenertem den sensaksemba mapang ashi.

Indonesia-i, Bali nung Bodhbarnü samaba submarine ya mongui bushir dang ta bilema liasü saka tangbo submarine ya tzüym telungi angemoka ir alitsü ta amanger aser sub nung mena alir taküm alitsü mimlar.

Ketdangsürtemi ashiba agi, crew 53 atema oxygen supply Honibarnü temer alitsü.

Honibarnü submarine nung mener alirtem atema oxygen supply temer alitsü ta bilemaka Indonesia-i, maneni Bali nung samaba navy indang submarine ya U.S. reconnaissance plane ka anisemer bushiogo aser tanga linük nungi rongtema iba inyakyim nung adentsü liasü.

KRI Nanggala 402 ya tzüym telungi lur alitsü aser mapang shidak nung meküzmükertettsü ta bilemer. Bodhbarnü tzüym telungi aiba sülen iba submarine den tesendaktep makai aküm aser navy chief-i ashiba agi, submarine nung oxygen Honibar anepdang tematoker alitsü.

"Kechi atalokdi atalokaka onoki mangu tashi bushitsü," ta Indonesia military otongdar Djawara Whimbo-i ashi.

America nunger indang reconnaissance plane, P-8 Poseidon Honibar anepdang Indonesia tonga aru aser Indonesia nunger rong 20, sonar keta aliba Australia nunger indang warship ka aser Indonesia nunger indang tayimtsü pezü den submarine bushi tenzük.

Singapore nungia rongtem Honibar nikongtsütsü tonga aruogo aser Malaysia nungi rescue vessels tem Deobarnü tonga arutsü imlar, ta Whimbo-i ashi.

Paisa, Indonesia indang hydrographic vessel-i tang tashi mejangjaba oset ka detect mesüteri lir, koba taoba mapangbo tzu telung nung meter 50 nungi 100 shi lur detect süteta liasü.

"Iba oset ya tzu nung apongdeka lir anungi senzua alitsü ta bilemer," ta pai ashi.

Submarine nungi osang kecha mali ajisüaka Sub nung mena alir kinungertemi bushitsüngdangba dak tamang

akar aser iba Sub ya mapang shidak nung ngutettsü ta tamang akar.

Indonesia tir Joko Widodo-i, submarine ngutettsü asoshi takok tashi inyaksü tetuyuba agütsüba den sub nung mena alirtem anema lia ngutettsü atema sarasadema atatsü mepeshia metetdaksü.

Submarine ya samaba tesem nungi bushi tenzük aser iba tesem nung oil slick ka nguteta liasü, ajisüaka oil slick ya iba sub nungi asütsü ta kuli tejangja mali.

Navy Chief of Staff Adm. Yudo Margono-i ashiba agi, totzü ya submarine indang fuel tank nung tapok aliba ajanga yimsiba asütsü akok mesera crew temi rong indang tozük tajemba kümdaksütsü atema totzü chiokba asütsü akok.

Ajisüaka navy-i, submarine ya tzu telungi meter 600-700 meter shi lur alitsü ta amanger, kong tzu pressure rongi metizüktsü.

Rong samaba kuli tang tashi mejangja, saka navy-i, electrical failure ajanga submarine ya tzu temai apongdeka adoktsü atema jongdak agiba jenjangtem magitet asütsü akok, ta ashi.

Germany nung yangluba KRI Nanggala 402 ya 1981 küm nungi Indonesia-i amshia arudar aser iba sub nung crew züngsem 49, gunner asem aser commander ka mena liasü, ta Indonesia Defense Ministry-i ashi.



Puurs, Belgium nung European Commission President Ursula von der Leyen-i Pfizer pharmaceutical company semdangba mapang Pfizer COVID-19 mozü süngden nung EU wako malpksüba noksa ung angur.

Kuwait-i India nungi aruba tayimtsü ajak nokdang

Kuwait City, Rongchii/April 24 (Agencies): Kuwait-i Honibarnü India nungi indang indanga aruba tayimtsü ajak tenokdangba agütsüogo. Iba tetuyuba ya osang tejangja ka magütsü tashi benoka atatsü, kechiyong India nung COVID-19 tensa tamajungba küma odar. Health ketdangsürtemi tuyuba sülen iba tenokdangba agütsüogo.

Kuwait indang directorate general of civil aviation-i, India nungi indang indaga aruba commercial tayimtsü ajak April 24 nü nungi tenokdangba agütsüba metetdaksüogo. India nungi indang indanga aruba mesera tanga tesem kar ajanga arurtem linüki maitdaksütsü. Parnok India adener anogo 14 tanga tesem kar nung anenzüker lira linüki aitdaksütsü, ta directorate sangdong ajangsa metetdaksü.

Kuwaiti senso, parnok kinungertem aser kidang yaritepertem linüki aittsü melatsü. Freight flights tembo maneni inyaksangshitsü, ta kasa sangdong ajanga metetdaksü.

Kuwait nung India nunger million ka dak tema lir, ta Kuwait nung Indian Embassy sangdong ka ajanga metetdaksü. Anogo ishika tejakdang UK, UAE aser

Canada-ia India nung Covid-19 tashidak kanga kara prokshia aoba apir tayimtsütem tenokdangba agütsüogo.

Kasa mapang nung UAE-i Hokolbarnü India semdangtsü atema tenokdangba agütsüogo aser ashiba agi, Gulf country nungi India-i passenger tem anir aotsü asoshibo melatsü.

UAE indang General Authority of Civil Aviation aser National Emergency, Crisis and Disaster Management Authority (NCEMA)-i ken o jangjashija ashiba agi, India nungi aruba national aser foreign carriers ajak nokdangtsü.

Kasa sangdong ajanga ashiba agi, iba inyakyim ya transit passengers bena aliba tayimtsü ajak atema asütsü saka India nungi UAE aruba mesera UAE nungi India-i aoba transit flight tem nem temelaba magütsütsü.

Ajisüaka UAE nungibo India-i passenger tem bener otettsü aser iba tetuyuba küboki maitba teloktem India nungi UAE-i anir arutettsü. Item teloktem rongnung UAE lisopurtem, linük anati shimba ketdangsürtem, official delegations aser golden residency bener alirtem densema, ta kasa sangdong ajanga metetdaksü.

Merkel-i German nungertem dang tetuyuba sülen anidaksü mepeshi



Angela Merkel (File photo)

Berline, Rongchii/April 24 (Agencies): Chancellor Angela Merkel-i Honibarnü Germany nungertem dang coronavirus tashidak kanga kara menatapa aoba tesemtem nung tenokdangba agütsür aliba sülen tashi angaa anidaksü metetdaksüogo aser ashiba agi, wara tasembenbuba poktetshiba nokdangtsü atema iba jenjang agitsü nüngdaka liasü.

Parliament nung chamber anapronglai iba hopta tetenzüklen Infection Protection Act, amendments agizükogo, koba ajanga federal sorkar tem nem wara den raratsü atema tashi tali agütsür.

Tashidak menar tali kümaka Federal states 16-i COVID-19 tenokdangba benoktsü atema teyuba sülen anidaksü memulungba den March ita linük mokdanga ayutsü atema mulungtepba anema nokdakba sülen Merkel-i ozüng tasen ka benok.

"Wara den raraba mapang

jenjang agiba rongnung iba ya jenjang tasen ka aser iba ya kanga nüngdaker ta bilemer," ta Merkel-i ashi.

"Iba ajanga wara prokshia aoba tajemba kümdaksütsü aser iba sülen sotadoktsü," ta laisa ashi.

Europe nung tanga linüktem ama Germany nunga wara azüoktsü atema timtema arudar aser medenser UK nung poktetba B117 variant ajanga wara azüoktsü tasak kümdaksüba den vaccine menor agütsü tenzükba ajanga kanga tebenja kümdaksüogo.

Hopta tsüngda tashidak menar tajemba kümra tenokdangba agütsür aliba salatsütsü, ta Merkel-i tenangzükba agütsüogo.

Ozüng tasenba ajanga anogo asem atonga nisung 100,000 nungi nisung 100 dak tashidak potetra item tesemtem nung ayaterem nungi anepdang 5 ako tashi curfews benoktsü asoshi sorkar nem tashi agütsür.

Realme indang Q-series sayaogo



New Delhi, Rongchii/April 24, 2021 (Agencies): Realme-i Q-series nung smartphone asem bendenlokba sangdongogo. Iba series nung - Realme Q3 5G, Realme Q3 Pro 5G aser Realme Q3i 5G dena lir.

Realme Q3 5G nung Qualcomm processor aser tanungba model anaprongla nung MediaTek chipset angutsü. Vanilla aser Pro variant nung 120Hz refresh rate aser Realme Q3i 5G nungbo 90Hz refresh rate dena lir. China dak alaka, smartphone asempronlga ya tanga shishilembadak sayatsü asoshi company ajanga osang tejanga ka magütsü.

Realme-isa India shishilembadak Narzo aser C-series kübok jenjang dalang agi smartphone balala yokdaki.

Vanilla Realme Q3 5G nung 6.5-inch Full-HD+ display den 120Hz refresh rate, 180Hz touch sampling rate aser 405ppi pixel density inokja lir. Iba phone screen panel yagi 600 nits peak brightness support asür aser screen-to-body ratio shilem 90.5 alitsü.

Octa-core Qualcomm Snapdragon 750G chipset deb Adreno 619 GPU, 8GB RAM aser 128GB storage ajanga phone maparen achaayangtsür. Item dak alaka, Q3 nung operating system ji Android 11-based Realme UI 2.0 out-of-the-box alitsü aser dual-SIM card amshitetsü.

Camera atema, iba smartphone tesülen rectangular module ka nung triple camera system inokja lir. Realme Q3 5G tesülen camera setup nung 48-

megapixel primary camera den f/1.8 aperture, 8-megapixel ultra-wide-angle camera deb f/2.3 aperture aser 2-megapixel macro shooter den f/2.4 aperture angutsü. Selfie tangoktsü atema, iba smartphone tejaklen 16-megapixel den f/2.1 aperture inoktsüogo.

Iba smartphone tesülen primary camera yagi 30fps nung 4K video recording support asür. Ano külen, selfie camera yagi 30fps nung Full-HD video tem tangokteter.

Tanga feature tsütsü reprangdangra, Realme Q3 5G nung 5G, dual-band Wi-Fi, Bluetooth 5.1, GPS, 3.5mm headphone jack aser security atema side-mounted fingerprint scanner angutsü. Iba phone battery tasazük 5,000mAh alitsü aser 30W fast charging nungitsü.

Realme Q3 5G - 6GB + 128GB storage variant jenjang CNY 1,299 (sen 15,000) aser top-end 8GB + 128GB storage jenjang CNY 1,399 (sen 16,200) alitsü. Iba den külemi, smartphone ya Psychedelic Silver aser Sci-Fi Black sentsü nung angutsü.

Realme Q3 Pro 5G nung 6.43-inch screen Full-HD+ resolution, sampling rate 360Hz aser 120Hz refresh rate inoktsüogo. Iba phone screen-to-body ratio shilem 91.7 alitsü, koba Realme Q3 dang nungi bezel tilaba alitsü. Octa-core MediaTek Dimensity 1100 SoC den ARM G77 MC9 GPU, 8GB RAM option den 256GB storage ajanga phone maparen achaayangtsür.

Iba phone camera setup nung 64-megapixel primary shooter aser f/1.8 dena lir; aser tanungba camera anaji Realme Q3 den kasa alitsü. Phone tejaklen 16-megapixel shooter ka inoka yanglutsüogo. Realme Q3 Pro 5G primary camera yagi 60fps nung 4K video tangokteter. Tanga feature tsütsü reprangdangra, Realme Q3 Pro 5G nung 5G, dual-band Wi-Fi, Bluetooth 5.1, GPS, 3.5mm headphone jack aser in-display fingerprint scanner angutsü. Iba Pro variant indang battery tasazük 4,500mAh alitsü aser 30W fast charging support asür.

Realme Q3 Pro 5G - 8GB + 128GB storage variant jenjang CNY 1,799 (sen 20,800) aser 8GB + 256GB storage jenjang CNY 1,999 (sen 23,100) alitsü. Iba smartphone Electric Blue, Firefly aser Gravity Black nung angutsü.

Maneni, Realme Q3i 5G nung 6.5-inch Full-HD+ display den 90Hz refresh rate, Octa-core MediaTek Dimensity 700 SoC den 6GB RAM aser 128GB storage dena lir. Camera atema, iba phone tesülen 48-megapixel primary camera den f/1.8 aperture aser 2-megapixel sensors ana den macro aser monochrome photography atema f/2.4 aperture inoktsüogo. Iba phone battery tasazük 5,000mAh alitsü aser 18W fast charging keta lir.

Realme Q3i 5G - 4GB + 128GB storage variant jenjang CNY 999 (sen 11,600) aser 6GB + 128GB storage variant jenjang CNY 1,099 (sen 12,700) alitsü.

**HAPPY 85TH BIRTH ANNIVERSARY
K. TALITSUNGBA KUBZAR (LONGJEMDANG)
DATED : 25TH APRIL 2021**

TEMEIM ABA / AWAO,

TULUSANG TSÜNGREMI
YANGLUJA ASER SHIMTETJA
YUTSÜBA TANÜ IBA TEBOR
TAJUNG NA ASOBA ANOGO
ASENOK AJAK ANEMA JUNG
LIA AJURUDAKTSÜBA ASOSHI
ASEN TEYANGLUR TSÜNGREM
TENÜNG ASANGER.

TULUSANG TSÜNGREMI MANENI
NÜ NEM ARISHI ASER ANEMA
ALIBA TAKÜM MOAJANG TA
ONOK TAMANG SARASADEM.

**- TETI DANG MEIMA ALIBA
JALA, JABASOTEM &
SEMCHIRTEM.**



OFFICE OF THE
KOHIMA AOR TELONGJEM

Kohima - 797001, Post Box.....Nagaland

SANGDONGER

10th April, 2021 anogo Kohima Aor Telongjem Yimkong Mungdang nung **2021-23** kümsük atema **KAT** ketdangpur team tasen shimba yamai sangdonger.

- | | | |
|---------------------------|---|---------------|
| 1. Wb. Chubalepzuk Ao | - | Tir. |
| 2. Wb. Chubayanger Aier | - | Tatong Tir. |
| 3. Wb. I. Lanusanen Jamir | - | Tongti Zülur. |
| 4. Wb. Temjen Pongen | - | Repsem Zülur. |

**Sd/-
President, K.A.T**

Kiphire nung Anti-rabies Vaccination camp ayongzük



Kiphire, Rongchii/April 24, 2021 (TYO): World Veterinary Day anogomung nungtem nung, Honibarnü (24.04.2021) Veterinary Hospital, Kiphire nung Department of Animal Husbandry & Veterinary Services, Nagaland den Nagaland Veterinarians Association longjemer "Veterinarians response to the Covid-19 crisis" omen nung ajemdaker Free Anti-rabies Vaccination camp ka ayongzüka liasü, ta sangdong ajanga metetdaksü.

Iba sentong nung, Nagaland Veterinarians Association President, Dr.K.N. Zubemo Humtsoe ajanga lemsatepba osang, Deputy Director, Veterinary Hospital, Kiphire-i telok dang zünga metetdaksü.

Iba osang nung, alima ajungalen Veterinarian temi taküm kumzüka maparen balala achaayanga inyakba nübur dang metetdaksütsü atema World Veterinary Association (WVA) ajanga

World Veterinary Day tenzüka liasü, ta shia lir.

Iba den külemi, health care aser medical science wadang tsütsü Veterinarian temi shilem agiba janjatetsü aser nisung den shiruru anaprongla soyapokya alitsü atema alima tajungba yanglutsü asoshi iba anogo amunger, ta pai ashi.

Shiruru tem tajungba anepalutsü aser iba den külemi maparen balala nung nübur ajangzükdaksüba den asen libajen tajungba kümdaksütsü aser Veterinary wadang maneni ajungkettsütsü asoshi WVD nükjidong lir, ta pai shisem.

Alima ajunga asungba Covid-19 wara tensa tamajungdang, nübur tenzüka wadang aser shiruru anepaluba maparen tsütsü Veterinarian temi shilem tuluka agiogo, ta paisa metetdaksü.

Iba Anti-rabies Vaccination camp sentong nung kidang metsüba shiruru (Azü) nem angati vaccine agütsüogo, ta kasa sangdong ajanga metetdaksü.



Pfutsero, Rongchii/April 24, 2021: Honibarnü, Pfutsero sub-division kübok Pfutseromi yimtsüng nung Minister Neiba Kronu aser tangar temi blacktop lenmang lapoktsüba yangi noksa nung angur. Tsükhenyie den repsema Pfutseromi Youth Organization (PYO) indang 72buba Youth Day anogomung sentong agiba mapang Minister Kronu-i iba blacktop lenmang lapokja liasü. Iba sentong ya April 27, 2021 tashi agitsü.

Archery World Cup: India tetsür team final-i iogo



Guatemala City, Rongchii/April 24, 2021 (Agencies): Honibarnü, India nungi recurve' tetsür team - Deepika Kumari, Ankita Bhakat aser Komalika Bari nungeri Spain tetsür team tsükdaktsüba sülen, Archery World Cup Stage 1 nung linük atema medal takok angutsü teimla tulu agütsüogo.

Ajisüaka, külem India nunger tebur team, shirnok seed' tasembuba ama qualify asü, Spain team den 4-4 tie asüba sülen quarter final asaya shoot-off nung parnok 26-27 agi tamakok angu.

Asayamung asem nung India-i ano medal asem angutsü asoshi tokteptsü terenemba lir. Apuani Atanu Das aser Deepika na temeyoktep tarep bronze playoff nung asayatsü. Kasa mapang tenaprongla kija asaya nunga tokteptsü. Tesüiba anogo ka tejakdang Das aser Deepika na pei pei tata asaya koka kija asaya semi final tongogo.

Tetsür Semi-final asaya nung Spain tsür Elia Canales, Ines De Velasco aser Leyre Fernandez Infante nungeri India team den toktepa asayatsü maongka tajung aika mengutet. Iba asayamung final tongtetsü atema India team-i point ngua 55, 56 aser 55 agi semi final-i final koktet.

2016 küm Shanghai asayamung final nung tesüa India tetsür team-i shilem agiba sülen, parnok tan World Cup final nung mezüing asayatsü.

Deobarnü, India tetsür team aser seed tenetbuba Mexico tetsür team tsüingda final asayatsü. Asia nung team tajung talisa Korea, China aser Chinese Taipei medeni team ana tsüingda tokteptsü.

India tsür recurve team-i World Cup pezü - Shanghai-

2011, Medellin-2013, Wroclaw-2013 aser 2014 tashi nung team atema gold medal takok ngua lir. Iba den külemi taoba mapang world no.1 Deepika-i asayamung pezüprongla nung takok ngua shilem agiogo.

India tetsür team rongnung Olympic quota mangu alirtem atema iba takok yagi kanga nungittsü. June ita Paris yimti kübok tatembangbuba Olympic qualification asayamung - World Cup Stage 3 asayatsü renema lir.

"Iba team asayamung ya kanga tongtibang, kechiyong Olympics atema onok rongnung asayar kar qualify masü lir. Ajasünung, team asayamung nung onok ajaki akok tashi temulung agüja asayatsü kanga tongtibang," ta semi final akokba sülen, India tetsür team nungi Olympic atema qualify ser alila Deepika-i ashi.

"Qualification asayamung nung onoki kokra, iba jagi team pur tali dang ajungmesotsü. Tanü, iba asayamung final nung onoki junga asayara taruba asayamung nung ano tajungba asayatsü asoshi onok ajungshitsü," ta Deepika-i shisem.

Hokolbarnü, Sports Complex Los Arcos kübok tetsür team quarterfinal tetoktepba nung, India-i point 6-0 agi asayamung ayonger team Guatemala City tsükdaktsü. Tan asayamung nung India tetsür team nungi asayar tasen aser takotet talisa taoba mapang world no 1 Deepika, Ankita den Jharkhand nungi asayar tasen - Under-18 world champion Komalika Bari nunger külemi asayadar.

Komalika-i ashiba agi, Deepika aser Ankita nunger ama kangarabo shisabulu melii asayadar.

"Timtem kecha melii team

den obang ka ser junga shilem agidar aser takok angutsü teimla lir. Takok angutsü atema Parnoki 10s nung kongshitsü meranga kahalokja asaya aser kü mapa bo 'yellow' temaitsü nung mezüing kahaloktsüba ji dang liasü," ta lai ashi.

Deobarnü, world no. 3 Deepika-i seed tenetbuba Mexico tsür Alejandra Valencia den asayaba mapang, India atema lai 'kija asaya' gold tasembuba bendenloktsütsü imlar. Quarter final kija asaya nunga Deepika-i junga shilem agiba nguogo, kong lai point 29, 30 aser 30 ngua Michelle Kroppen tsükdaktsü.

2018 küm Saltlake City kübok ayongba asayamung nung Deepika-i gold ngur külen nungi tan asayamung nung lai mezüing gold angutsü teimla lir.

Quarter final masayadang, tanga round nung Deepika-i set pungobuba nung point 29 ngua Aida Roman den draw süa tiebreak nung point 10 ajangzüktet.

Deepika dak alaka tebur kija final asaya nunga la kinungbo Das-ia World Cup gold medal mezüing angutsü teimla tulu lir.

2016 küm Antalya, Turkey nung Das-i jenjang pezübuba nung takok angu. Iba asayamung bronze playoff nung Das-i Korea nunger Kim Woojin makok.

Semi final nung Das-i Mexico nunger arishi küm 20 tain Angel Alvarado den asayatsü, saka pai Dutch nunger Steve Wijler den kanga meranga tokteptsüla.

Taoba mapang world bronze medal takok angur aser tang world No 4, Wijler-i gold atema tokteptsü terenemba lir. Kasa asaya nung Spain nunger Daniel Castro dena lir.

2022 World Cup tashi dang asayatsü: Mithali Raj

New Delhi, Rongchii/April 24, 2021 (Agencies): Honibarnü, India tetsür Cricket team indang ODI captain Mithali Raj-i, International Cricket nung küm 23 tashi asayar sülen, 2022 küm New Zealand nung ayongtsü aliba 50-over' World Cup nung tatembangbuba asayatsü, ta ashi.

Arishi küm 38 tain Mithali, ya India tsür cricket asayar rongnung asayar tajung ka ama züngshir.

New Zealand nung bowler tajung den asayatsü asoshi yongyar, ta lai ashi.

"International cricket nung ajemoker küm 21 jungogo aser 2022 küm - World Cup ji

tatembangbuba asütsü," ta '1971: The Beginning of India's Cricketing Greatness' kakat sayaba mapang Mithali-i ashi.

Iba kakat ya Boria Majumdar aser Gautam Bhattacharya nati zülü aser Harper Collins-i adoktsüogo.

India tetsür team-i England, Australia, New Zealand aser West Indies den bilateral series pezü tashi asayatsü terenemba lir.

"Batting asayar ka ama, tang nungi tenzüka tour ajunga kanga tongtibang alitsü, kechiyong World Cup atema team den tanaben longjemshir team tajung ka ama asayatsü asoshi ni renemtsü," ta lai ashi.

"Külem team pur dak teimla

lir aser tang ama tensa tamajungdang parnok dak aketba sempet tajungtiba amshia taruba asayamung atema tejangraba nung renemshiba angudang temulung nung anisüingzüak angur," ta lai shisem.

Mithali-i, item asayamung metenzükdang fast bowling tsütsü lenla aika nung melenshitsüla lir, ta metetdakja liasü.

"Team rongnung asayar kar jenjang asadangshia aser tashimaitba tesem nung melenshia New Zealand nung World Cup atema tajungtiba renemdaktsütsü onoki asalentong yangludar," ta lai ashi.

2024 tashi Suzuka nung Japan F1 GP asayatsü

Tokyo, Rongchii/April 24, 2021 (Agencies): Honibarnü, Formula One aser circuit kiburtemi küm asem contract atsülangba osang sangoktsüba sülen, 2024 küm tatem tashi Japanese Grand Prix ya Suzuka tesem nung ayonga asayatsü renemogo.

1987 küm Nagoya tsütsü amenoka aliba track 8 circuit nung mezüing Formula One race ka ayonga asayaago aser drivers' championships 11 atema maparen achaayangtsüogo.

"Asia nung saisapong wadang tsütsü renloka aser tejakleni maneni aotsüsa iba contact atsülangba yagi onok tsüingda ano bendanga agütsüshir inyaka aotsü aser tanü tashi Mobilityland den tesendaktep meraksai takok ngua inyakba asoshi parnok danga pelaba metetdaktsü," ta sangdong ka ajanga Formula One chief executive Stefano Domenicali-i metetdaktsü.

Mobilityland' ya Honda indang subsidiary ka lir.

Japan nungi asayar (driver) tasen - Yuki Tsunoda lir. Arishi küm 20 tain Yuki ya Japan indang mezüing grand prix driver lir aser 2014 küm nungi pai grand prix nung shilem agia arudar. Ajisüaka, tan season tatemlen Red Bull indang 'engine partner' - Honda-i iba saisapong wadang toktsütsü.

Taoba ita Bahrain nung Yuki Tsunoda-i jenjang tukububa ajangzüktetba mapang, pai Red Bull meyong AlphaTauri den longjemer F1 race nung mezüing shilem agia liasü.

Iba asaya temer sülen, Yuki-i pa tebu den külemi Suzuka-i aotsü aser iba race reprangtsü shiogo. Pai world champion anaben tashi akoksang Fernando Alonso kanga sapur. Alonso-i Renault meyong Alpine den longjemer iba grid nung shilem agidar.

Alima ajunga asüingba Covid-19 ajanga taoba season iba circuit nung race masaya. Taruba küm iba circuit lapoker küm 60 ajungba benjungmung amungtsü.

Plasma therapy atema Sachin-i azü tenlatsü

Mumbai, Rongchii/April 24, 2021 (Agencies): India nunger nüngtugu cricket asayar Sachin Tendulkar, shiba dak taoba ita Covid-19 tashidak puteta mozüki nung munger sülen taneptsü ngur lir, Honibarnü pa arishi küm 48 jungogo.

Sachin-i pa asoba anogomung nüngtem nung, plasma therapy atema azü tenlatsü ta ashi aser iba tesashi wara nungi taneptsü angur ajak dang kasa maparen mulungsoa inyaksü ajungshia liasü.

Honibarnü, Twitter sabang ajanga, cricket asaya nungi anener alisang, batting maestro Sachin-i, "Doctor temi kü dang teyuba ka nenok den lemsateper. Taoba küm, ni plasma donation centre ka lapoktsüogo. Mapang shitak nung Covid-19 tashidak nungi taneptsü angurtemi plasma tenlara, ibajagi shiranga alirtem yakta taneptsü angutsü akok ta doctor temi kü dang shiogo. Kodangsa meladir, nia kü indang plasma tenla agütsütsü renema lir aser iba maparen atema doctor tem den jembitepogo," ta lemsatepa liasü.

Shirnokisa Covid-19 nungi taneptsü ngur lir, imlibilema doctor tem den ajurutepe plasma tenlatsü atema jembitepang aser parnok (doctor) melara nenoki mulungsoa azü tenla agüjangma. Iba ama mera tajung agiba

ajanga timtem aika koktettsü. Tashidak puteter alirtem taneptsü mangu tashi adianutem mesüra medemertem shisabuluba ajaki jangjaa lir. Ajasünung, tangatetba tajung nung nenoki azü tenlatsü aser timtem nung alir külem sensorurtem yaritsü asoshi ni mepishir. Ni iba wara agi shirangba mapang, shirnokisa aria bilemja sarasadem ajanga nungita yariogo, nenok ajak dang pelaba metetdaktsü," ta Sachin-i lemsatep.

March ita Covid-19 tashidak agi timtemba indang yimdangi aru lemsatepba mapang, Sachin-i, "Ni asoba anogomung nung salem lemsateper ajak dang pelaba shisemer. Taoba ita ni kanga timtemba liasü. Kü dak Covid-19 positive putetba ajanga anogo 21 tashi shinga den majurutepe anepaluogo. Nenoki sarasadem ajanga nungitba den doctor aser parnok den külemi inyaker staff ajungai temulung agüja anepaluba asoshi iba wara nungi ni taneptsü ngutet. Nenok ajak dang kangasa pelar," ta Sachin-i ashi.

Covid-19 agi shirangertem anepalutsü atema, taoba küm July ita Andheri kübok Seven Hills Hospital nung Sachin-i Plasma Therapy Unit ka lapoktsüogo. Iba Unit ya Brihanmumbai Municipal Corporation (BMC) indang mapatong ka lir.

BILEMDANGANG

"Asayar tajungibo o tarok temela kecha mesükshii telok nung jembiteter."